

1 gretl und dgrün
 das wa mei wün
 des dad i gean hean
 wiad scho wos wean
 ins ocht neuni nuller
do kean de zwoa knuller
 wei san de ned drin
 gibt oisse kan sinn

2 owa gretl sei ned zwida
 owa gretl sei ned faad
 owa gretl los mi drüwa
 oft griagst an schoklaad

3 und a grü sitzt im gros
 und pfeift si grod wos
 und auf amoi is schtaad
 schädl ogmahd

4 dwöd is a ringlgschpü
 drahd si im kroas
 wo des nu higeht wiad
 wia guad daß neamd woas

- und i red wos i wü 5
und i tua wos mi gfreid
und i schea mi goa ned
um de woschadn leid
de goa so vü redn
und bled dan üwa mi
san olle mitanaunda
vü schlechta ois i
- und wieder drahd si olles 6
und weida gehd die show
mia bleibm jo nu a zeidl do
we dont wanna go
- i hob gschrian und hob blead 7
hob gsunga und gread
woa gsund und woa kraunk
so wia a tisch und a baunk
i woa obm und unt
und in da hö scho amoi drunt
hiatzt wa i wieda do
und geh trotzdem neamd o

8 gscheada hiramö gscheada horammö
iß a rohs fleisch is guad fian hian schweiß
 schmia da in bauch ei mit soimiack
dasd mehra hian griagst und weniga gnack

9 gestan hods gschneibt
 und koid is im laund
hiatzt san ma de läus dafroan
 unta mein gwaund

10 waun i nimma mog
 und bin grantig vor not
daun schtreich i ma in oasch blau au
 und dhaxn rot

11 in unsan bianbam
 is a voglnest drobm
bin i auffigschtign hob i einigschaud
 woa koa vogl ned drobm

12 im toi is da newö
 am berg obm is kloa
und wos de leid vo mia redn
 is ois ned woa

hoids eng zaum hoids eng zaum 13
heid is koa sünd
i hobs in kalenda gschaud
heid gehd da wind
und wo da wind hea gehd
des siacht ma glei
bei de oan gehda eini
bei de aundan voabei

gestan auf dnocht 14
do hauma glocht
mia haum nia aso glocht
ois via gestan auf dnocht

i hob das gsogt 15
du host mas ned glaubt
i sog das solaung
bis dasd mas hoid glaubst

i tua ned vü singa 16
i tua ned vü sogn
und i trau ma koa henn
aus da schteign aussijogn

17 auf beim schpund dwöd geht zgrund
waun ma nimma lebm samma nimma gesund
 kemma nimma sogn auf beim schpund
 dwöd gehd zgrund bumm

18 dort drobm aufm berg
 is a hefm voi kraud
 i hed gean davau gessn
 und hob mi ned traud

19 i trau ma i trau ma
 i trau ma ned traud
 owa waun i amoi gressa bin
 trau i ma schau

20 und a frau schaud ihan mau au
 und a mau schaud sei frau au
 und si schaun si so au
 wia ma si nua auschaun kau

21 da fink sogt zum zeisal
 und zeisal zum fink
 ind shtodt eini fliagn ma ned
 weis aso shtinkt

- gestan und heid 22
hod de sun so sche gscheind
hod nu nia so sche gscheind
ois wia gestan und heid
- üwan see üwan see 23
fliagn meine taubm ind heh
muas amoi ummifoan
fedan zaumglaubm
- mogst ollewei raunzn 24
mogst ollewei schrein
waun da kittlsog gressa wa
schiabats uns ei
- es gibt große und kloana leid 25
de oa san dumm und de aundan gscheid
und de wos goa nix doan shtend
kennan bled schau und dumm redn
- schauts nua wias regna tuad 26
schauts nua wias giasst
und wia von de dochlottn
da dreg owaschiasst

- 27 a schpau untam nobö
do schpringt da bauch auf
do sitzt a schwoaz katzal
und passt auf a maus
- 28 do hinta da schtaun
do sitzt a falott
und ea traud si ned viara
weila dhosn voi hod
- 29 da adam und deva
hausm gebot vagessen
san in dschtaun einigräud
und haum äpfö gessen
- 30 a automobü
is a automobü
kaumma sogn wos ma wü
sbleibt a automobü
- 31 vorige wocha
hauma an teifö ogschtocha
wea a teiföfleisch mog
dea kau kema de tog

znaxt haums an teifö gfaunt 32
haum eam in wogn eigschpaund
haums eam in schwaunz vabrennt
do isa grennt

owa kraxnweib kraxnweib 33
bleib a wenig schteh
i scheiss da ind kraxn
oft mogst wieda geh

i schpring auf a doch 34
wei da bam rennt ma noch
de knia san im wossa
es wiad oiwei nossa

wigl ned aso wogl ned aso 35
shäusl foid zaum foid zaum
wigl ned aso wogl ned aso
shäusl foid zaum
setz ma a schpreitzn au
das uns ned zaumfoin kau
wigl ned aso wogl ned aso
shäusl foid zaum

- 36 wigl ned aso wogl ned aso
 hinta mein bett
du rennst ma in soachtegl um
 siachst denn des ned
- 37 heid geh i ned aus
 wei da wind aso saust
 wei da wind aso tuad
 is ausgeh ned guad
- 38 hob üwaroi gschaud
 a hintam kraud
 hob üwaroi gsuacht
 des is vafluachd
- 39 da kopf faungt zum sausen au
 jo wie i lauta schtroh drin hau
 dmäus san jo a scho drin
 jo wie nia a kotz eikimmt
hiatzt is ma da vaschtaund davau
 wos faung i do nu au
 hiatzt hob i goa koa hian
 und woas koans mea zkriagn

fria haums koa uha ned ghobt 40
de oidn mauna
haum in mist einigschaud
und san zum essn gaunga

zum politisian 41
haum jo miara zweng hian
san de aundan so gscheid
und föd a hümmöweid

znaxt bin i üwan see umigschwumma 42
fliagt ma a brodne antn ins gsicht
hob i ma mein anorak zrissn
fürchtet euch nicht

wauns nua ned regna tuad 43
wauns nua ned schneibt
wauns na ned schlechta wiad
wauns na so bleibt

wia da vogl hi is gwen 44
hob i eam wos zum fressn gebm
hod ea sei mäu auftau
nimmt nix mea au

- 45 a schwara a launga
 is leicht zum faunga
waunst kloa bist und schleini
 schlupfst uwaroi eini
- 46 hinta da hoslschtaun
 bleib a wenig schteh
oft wean da de narrischn
 schnaggal vageh
- 47 fria hauma goa nix ghobt
koane schuach und koa gwaund
heid hauma wieda läus und fleh
 ois duachanaund
- 48 a auto und a goasbock
 des is a grechts poa
 sie schtessn ois nieda
und schtingan olle zwoa
- 49 i hea di scho singa
 i hea di scho plean
wast hoid a hamml woan
 oft kunnt ma di schean

a besuch und a fisch 50
bleibm gauns gleich laung frisch
kaum san drei tog goa
schtingans olle zwoa

da bau dea nimmt sis betn fia 51
smäu reißt ea auf ois wia
ea zlegsnd in radlbock
und jo a in daunglschtock
neiboarisch oxnjoch
loatawogn so hüf ma doch
aus is mit mia
schreid da bau zu sein schtia

dea oane kummt in hümmö 52
da aundare ind hö
es kau si jeda wendn
wohin ea grad wö

da adam und deva 53
de schwimman im see
da adam gehd unta
und deva ind heh

54 da attwenga tischler de liabe maus
hod jo irwengst so an rausch
hea in geh do mog da gsö
schia jo ned dazahn sei gschö
da schnuaboat woxad a
jo waun da grund ned schlecht wa

55 da fux und da hos
gengan mitanaund ins gros
und da fux hods ned gwißt
das da hos sovü frißt

56 a buxbaumas laubat
und a oachana schtock
waun da hund auf a goas böd
weddad da bock

57 a schtoaoide maus
is in ofm krocha
hod si dochsl ausghaid
und in schwoaf obrocha

- daßd wos valoan host 58
des is scho gwis
du wiaßt das scho findn
waunst nua wissasd wos is
- wauns regnt so regnts noß 59
wauns schneibt so schneibts weiß
wos aundare leid ärgert
des tua i mit fleiß
- in elend hauma doan ogschniddn 60
dleis hauma uns söbm vatriebm
dschuidn hauma in rauchfaung ghängt
dnot hod a end
- es gehd ma oizeit aso 61
so auf und nieda
hed is hexn gleand
i valeanads nimma
- gestan hauma baundnudln ghobt 62
baundnudln san guad
waun mas wieda amoi kriagn
schteck i ma oane am huad

- 63 a oaden a oaden
 is a gschpassigs ding
ea schmeckt ned und schtinkt ned
 und hod a koan sinn
- 64 aufgwixt und zaumgwixt
 mia haum dahoam a nix
 ois a zaudiarre goas
und de daleit ned vü gschpoas
- 65 kaufts ma a wuazn o
 oda a öl
 is fia des beissad guad
 beißts wo da wöl
- 66 iwafian iwafian
 schreid de kloa fischersdian
 zweng den scheiß iwafian
 ia aso woan
- 67 wia da vogl hi is gwen
 hob i eam wos zum fressn gebm
 hod ea sei mäu auftau
 nimmt nix mea au

- elektrisch muas ois nu wean 68
elektrisch wiads lebm und schterbm
elektrisch wean de kinda gmocht
elektrisch auf dwöd heabrocht
is da mau siebzge schau
und nu ned schterbm kau
wiad ea am end
elektrisch darennd
- de sechsadreißg tausend schuin 69
de soi da teifö hoin
unds mensch a dazua
oft is a rua
- ob i sing ob i pfeiff 70
oda ins taschl greif
ob i pfeif ob i sing
is im taschl nix drin
- da gödbeidl is zrissn 71
shosential volla rost
is des a wunda
wauns lebm sovü kost

- 72 i geh amoi fiare
 i geh amoi zruck
 i duris wossa
 drum brauch i koa bruck
- 73 und wauns jedn so gang
 wia ea moant dasa mecht
 daun gangs de aundan
 glei nuamoi so schlecht
- 74 bist gestan do gwen
 und heid a scho wieda
 waunst morgn wieda kimmst
 wirst ma a scho zwieda
- 75 gengan de mentscha am kiada taunzn
 richtn si si zaum an pflauns
 schtön si recht reizend via
 jo sogoa bis zu de knia
 weida deafst ned auffischaun
 wei do hod da hodamau
 sei magazin und sei
 niedalos drin

i hob hoid mei häusl 76
am berg auffibaud
und des hod ma a winziga
vogl umghaud
und i wea scho den winzign
vogl nu kriagn
und i wea eam sein schnobl
vadrahd auffibiagn

owa lustig wiads wean 77
waun de zeit amoi kimmt
waun ana den aundan
bei de oawaschl nimmt

tua laungsaum tua laungsaum 78
tua ned so gschwind
wia ma knedl tuad mocha
woaß a jeds kind

wauns lewaknedl regnt 79
und brodwiaschtln schneibt
daun bitt i in heagott
das wedda so bleibt

- 80 is denn dos woa
 das a sau borstn hod
 borsten und koane hoa
 is den dos woa
- 81 da voda bockt golatschn
 mit powidl frisch gfüd
 do wiad da ella fritz
 ia hunga gschwind gschtüd
- 82 und a mistgobl ois a hoanodl
 und a schtiakeddn umman hois
 fia so a saubas diandl
 jo do kaufad i ois
- 83 und de schmiedbuam de schpitzbuam
 de kennans so fein
 beim tog mochans nägl
 und bei da nocht schlogn sis ei
- 84 mitn huad in da haund
 kummst weid umanaund
 owa mitn gödl im sog
 host mitn huad a koa plog

znaxt hob is schnoizen ghead 85
 schnoizen beim zaun
boid is nu amoi schnoizn hea
 muas i glei schaun

und da boch is üwa dschtroß umigrunna 86
 dfisch haum vo de bam owagsunga
 dkia haum si schwoimnesta baut
 do haum dleid gschaud

und a oids foß hod an oidn roaf 87
und a oida mau hod an oidn schwoaf
und a oids weib hod an oids lo
 owa rappön megns do

hinta da hollaschtaun 88
 sitz a gugu
und dea hoa a weiß häuwal auf
 grod so wia du

da baua und da hund 89
und da gemeindeschreiba
haum mas mensch ned vagund
 de drei hungaleida

- 90 znaxt hob i grauft
 mit an kapuzina
i hob eam beim boat dawischt
 hiatzt rauft ea nimma
- 91 schtrumpf hod ea a koan au
 und is so koid
dfäustling hod ea a valoan
 hiatzt is ea dafroan
- 92 warums eadöpfö gibt
 des woafß i jetzt scho
das a da kloa häuslmau
 wen dhaut oziagn kau
- 93 tad ma dummheid vaschteian
 daun hed ma gnuag göd
 es gibt ja nix dümmas
 wia dleid auf da wöd
- 94 es gibt ollerhaund maschinen
 di oa drischt de oa saad
hiatzt brauchad mag grod oane
 de dschteian zoin taad

- hiatzt hob i mein goasbock 95
aufs doch aussu tau
das olle leid seng
das i a a viech hau
- aufm berg singan dlerchn 96
im woid schlogt da fink
zhaus hob i a nochtigoi
di a so sche singt
- a heuschreck mit fedan 97
und a maikefa mit an pfluag
und a füzlaus hob i a nu nia gseng
mit an grean huad
- hinta mia voadä mia 98
krahd oiwei a hau
mia wa jo vü liawa
ea peckad mi au
- waun di oana foppt 99
und a nu bled redt
oft haust eam oane eini
owa grob sei deafst ned

100 und waun da hund gsund is
 is gsund fia den hund
und waun da hund ned recht gsund is
 is ned gsund fia den hund

101 ind shtodt bin i gfoan
 mit an gläsan schubkoan
hob ma doaschbockn gfreadd
 des hobts a nu nia ghead

102 unten in zlinz
 do gibts a tunnö
waunst einifoast wiads finsta
und waunst aussikummst wiads hö

103 hinta da hollaschtaun
 do is wos gscheng
 ma woäß zwoa ned wos
 owa dleid de haums gseng
 jo dleid de haums gseng
und sie wissens gauns gwis
 sie haums hoagenau gseng
 das finsta gwen is

in da fria um hoiwe drei 104
hod hennaschteign krocht
hod da gigl bei da gogl
sei schuidigkeid gmocht

gestan is sunnda gwen 105
heid is maunda
hiatzt tad mi scho wieda
umman feichta blaunga

hi üwas lo hea üwas lo 106
dbäurin scheidt öpfiko
da baua scheidt a dazua
öpfiko gnua

hiatzt mochts auf hiatzt mochts auf 107
hiatzt kummt da kerschenschtaub
hinta da ofmbeng
schtaubts scho a weng

mei muada bocht kropfm 108
und i brunz aweng au
oft bleibms sche softig
und brennand ned au

- 109 mei diandl hoast frida
 is oiwei recht zwida
 owa waun i ia gscheid tua
 gibt dfrida a rua
- 110 heid hob is wieda söwa gmocht
 söwa gmocht söwa gmocht
 heid hob is wieda söwa gmocht
 ois bei da nocht
- 111 in an honigglasl sitzt a frauenkäferl
 i ziags aussa und schlecks o
 und vo dera jausn tuad ma heid nu grausn
 woa ka frauenkäferl woa a schpotz
- 112 dort drobm aufm bergal
 wo dsunn fiarablitzt
 do scheißn drei bauen
 dass da dreg umaschpritzt
- 113 innviadl woaz und koan
 traunviadl roß und wogn
 mühlviadla kraud
 dass beim oasch aussa schaud

zwinschpinnamirl bamschteigagretl 114
mia haum an koda dea hod an schedl
haumma eam in schedl ind milli einitau
da koda dea hod gschaut

auf die hod da heagott 115
an bsundanen zoan
sunst wast shtod ana brenessl
a maigleggal woan

beim gigglgoggl haun i goas ghiat 116
bin i a ned laung bliedm
is a bockschtara schwoaza schwobmkäfa
üwa dmüllisuppm umma gschtiegn

jo wißts hiatzt des neuchast schau 117
mia haum hiatzt an weihnachtsmau
dea hod vor da heilign nocht
schrstkind umbrocht

gestan haumma an christbam gschtoin 118
und heid kranz man auf
und moring foin dnodln o
hiatzt scheid i boid drauf

- 119 in da heilign nocht
 hob i a schwoabsuppm gmocht
 bis das wossa siad woadst
 waunst mit bettlbriaf hoazt
- 120 owa zidanschlogn zidanschlogn
 des is mei freid
 des hod mia mei voda gleant
 mit an trum scheid
- 121 da ochs hod mitn herndl sheu owagschmissn
 sdiandl hod mit da fersn dnuß aufbissn
 da hau hod mitn schnobö schpauscheida ghaud
 do haum dleid gschaud
- 122 mei schwiegamuada des schindaluada
 mocht daumpfnudln so kloa
 mei schwiegavoda dea raumökoda
 frisst oisaumt alloa
- 123 und er hat si ja nua
 auf die schulter geküsst
 weis eam ums maü umma
 zdreckig gwen is

hobt sis scho ghead es leid 124
mia lebmn in ana hundign zeit
es kummt nu soweid
dass mehra hund gibt wia leid

eisenbahn eisenbahn 125
lokomotiv
vorn loßts an puffa
und hintn an pfiff

lustig is auf da wöd 126
brauchma koan kreiza göd
samma hoid frisch
wia im wossa da fisch

zum frühschtück a suppm 127
an fisch auf mittog
um hoiba drei krebsn
a raubvogel auf dnocht

sche gschissn sche gschissn 128
sche zuwi zum zaun
mit de finga drei griffm
wean dnögen sche braun

- 129 und i geh neama auffi
 zum scheinbauan
 haum mi daumoasen bsoacht
 in da hollaschtauan
- 130 glaub jo ned i wogl
 und kau ned recht schteh
 i kau wegn mein zuaschtaund
 nua ned recht geh
- 131 so oana wia du bist
 de wogsn am hennamist
 und in da kuamistschtrah
 do find mas aa
- 132 annamirl sei schtü sei schtaad
 daß di da wind ned drahd
 annamirl sei schtü sei schtaad
 daß di ned drahd
- 133 i hob das gsogt
 du host mas ned glaubt
 i sog das solaung
 bis daßd mas hoid glaubst

wauns nocht is gehma schlofm 134
wauns tog is schtehma auf
wauns kocht is gehma essn
wauns goa is heama auf

mit dem scheid hintummigeh 135
hods di vawiasd
hiatzt foid dia da schnee ind schuach
und gfreid da dfiaß

vom innviatl eina a bua a kloana 136
wia mi dea gfreid hod
smensch gsogt hod
mei lebtog koana

und im grobm drunt de oide schwiegamuada 137
mocht krautnudln nimma guad
waun si schterbm tad das i erbm tad
wurdn dkrautnudln wieda guad

dschandarm hauma schtottn gulasch gfressn 138
dpolizei schtott de wiascht
djaga hauma oisa greane gfressn
auf des klumpad auffi hod uns diascht

139 goa a bsundane zeit
 hauma hiatzt auf da wöd
 weis sovü beidl gibt
 und soweng göd

140 wos nutzt ma des grantln
 wos nutzt ma des sorgn
 slebm gehd jo grod
 vo heid bis auf morgn

141 sitz di hoid nieda
 und treima an schpoß
 saufma zehn hoiwe
 und jogn ma a goaß

142 waun i wissad das gang
 das bäurin ned kam
 gang i owi in kölla
 und schleckad beim rahm
 i schleckad im kölla
 vom rahm oiwei schnölla
 wei i woas jo das gang
 wei dbäurin ned kam

i hob hoizöpfö gockad 143
hob bockscheida gmahd
hob riamüllli gschpunna
von da frua bis auf schpaad
hob schpaschreißl ghoböd
hob sogschoatn klobm
hob taunzäpfm gfuadad
im taubmkobö drobm
hob eaöpfö droschn
hob hoslnuß gmahd
hob ois mitanaunda
recht sakrisch vadrahd

da schneida reit auf da goas 144
de goas mocht an schprung
da schneida hebt in schtutzn ind heh
de goas bringt mi um

aufm knedlhefmdeckl in da rumplkaumma 145
do sitzn zwo fleh
da oane tuad zithanschlogn
da aundare hupft ind heh

- 146 zur hochzeit sogt dfrau
 hiatzt schtech ma o dsau
 sogt da mau drauf zu iha
 wos kaun de sau dafia
- 147 znaxt hod si a maura
 in dsunn dauni gsitzt
 damit de leid seng
 dara a amoi schwitzt
- 148 das rindfleisch so teia is
 des is ma zdumm
 es rennan jo eh sovü
 rindvicha herum
- 149 solaung i koa baua bin
 wiad ma koa roß ned hi
 foid ma koa shtodl zaum
 weil i koan hau
- 150 de häusa bauns hiatzt
 noch da neuesten mod
 wauns im drittn shtock niasn
 sogns im erstn höf gott

- znaxt is a unglück gscheng 151
woids sis wissn
is a radlbock auskemma
hod in fuhrmau bissn
- am sunda gibts schpeckwiascht 152
mit knedl und kraut
da baua frisst dwuascht
in knecht gibt ea dhaut
- a windal a vogal 153
a bliahrada bam
de drei haum mi bsuacht
in an wundaschen tram
- das diandl koa zucka is 154
do bin i froh
sunst wa vo mein schlecka
scho längst nix mea do
- oamoi is koamoi 155
und zwoamoi ned vü
dreimoi des wa scho recht
waun i nua mecht

- 156 in da frua sche laung schlofm
 an guadn mittog
 a doppöde jausn
 is des wos i mog
- 157 vo soizburg auf linz
 sans sechsadreißg schtund
und do hob i mei mensch eitauschd
 auf an scheen hund
- 158 da adam und deva
 haum gwett umma kefa
 da adam hod gwunna
und deva hod gschpunna
- 159 waunst di a schneidst
 in mein toschnmessa
 in sechsadreißg wocha
 wiads scho besa
- 160 waun i so schee wa
 wia de nochbanmentscha
 tad i mei schönheid
 vors fensta hänga

des dümmste wos da heagott schuf 161
is bei neapl da vesuv
ea löst sei raucherei ned bleibm
obwohl ea woas ea muas schpeibm

eantan boch ent 162
hod si a heuschreck varennt
und herentan boch do
geht a da heuschreckin oo

mia san hoid de oitn 163
im gsicht volla foitn
am kopf de graun hoa
hiatzt kemmans au de schen joa

im lungau im pongau 164
im pinzgau in tux
gehn dhenna ind kira
do predigt da fux

i sitz drobm am podium 165
schau owa auf dleid
i schpü ned fia an jedn
nua fia den dea mi gfreid

166

**dnocht hod zwöf schtund
und daun kummt da tog
daun wieda dnocht
daun wieda da tog
daun wieda dnocht
daun wieda da tog
daun wieda dnocht
daun wieda da tog**